

ATENTATU BATEN HELBURU ZELA ESATEKO GOIZEGI DELA DIO BARNE MINISTROAK

Atxilotuek Fragari buruzko informazioa zutela dio Mayorrek

Pontevedran atxilotutakoek Manuel Fragari buruzko informazioa zutela baieztatu zuen atzo Jaime Mayor Orejak. Dena dela, helburua zen edo ez esateko goizegi dela gaineratu zuen. «Lanaren arriskuak dira», esan zuen Fragak hipotesi horretaz galdetu ziotenean.



Manuel Fraga Galiziako Xuntako lehendakaria Santiagoko gotzainarekin, santuaren ospakizunetan.

EFE

Agentziak / Santiago

PONTEVEDRAN atxilotutako ETako ustezko hiru kideek Manuel Fraga Galiziako Xuntako lehendakariari buruzko informazioa zutela ziurtatu zuen Jaime Mayor Oreja Espainiako Barne ministroak. Dena dela, gaineratu zuen berak ezin zuela ziurtatu Fragari eraso egin behar ziotenik. «Goiz da Ministerioak zehatz ditzan komandoaren helburuak zeintzuk ziren», esan zuen Mayor Orejak. Atxilotuek Fragari buruzko datuak izan arren, «nik ezin dut adierazi zehatz-mehatz zeintzuk ziren komando honen helburuak».

Hala ere, asteazken gauean albiste agentzia batzuek ziurtat eman zuten komandoaren helburuen artean Manuel Fraga zegoela eta Santiago Egunean bere aurka egiteko asmoa zutela. Hurrengo eguneko egunkari askotako titular nagusia izan zen.

ETAren kontrako borrokako adituen arabera, Fragaren aurkako atentatua bonba-auto bidez egitekoa zen, atxilotuei lehergaiarik atzeman ez badiete ere. Poliziak oraindik ez daki atxilotuak noiztik zeuden Galizian. Pontevedrako pisan uztailaren 5etik

bizi ziren eta hilabeterako alokatu zuten, hau da, uztailaren 31n bueltatu behar zituzten giltzak, etxebizitzaren jabeak azaldu zuten.

ETAk Galiziako nazionalisten sustengua izatearen aukerari buruz, horrelakorik pentsatzeko daturik ez dagoela adierazi zuen Barne ministroak. Halaber, BNG alderdiarekiko konfiantza agertu zuen. «Ez dago pentsatzeko mo-

tiborik BNGn honekiko kolaborazio jarrerarik dagoenik. Konfiantza osoa dudala adierazi nahi dut», esan zuen Mayorrek Madrilen, Parisera abiatu aurretik. «BNG Madrilgo Itunean dago eta nik ez dut inolako akusaziorik egingo, alderantziz, Itunaren barruan daukaten jarrera indar dezaten animatu egiten ditut».

ETAk «Espainia osoan egiten ditut atentatuak, dagoeneko ez

dago garraibide mugarik», gaineratu zuen Barne ministroak. Mayorren ustez, «ETAren estrategia da etsipena eta amorrua sortzea, ahalik eta elkarte autonomo gehienetan». Galizian atentatu nahi izana edo Kordoban atentatu bat egin izana ez dela gauza berria argudiatu zuen Mayorrek. «Edozein espainiar izan daiteke ETAren atentatu baten helburu», gaineratu zuen.

Fraga: «Aurre egin behar diegu»

ETA-RI eta bere sustatzaileei aurre egiteko eta «legez kanpo» uzteko deia egin zuen atzo Manuel Fragak, bere kontrako atentatuaren hipotesia aipatzean. «Lanaren arriskuak dira» esanez, Fragak garrantzia kendu nahi izan zion bere kontrako atentatuaren aukerari.

«Nire biziak kezkatzen nau, baina une honetan garrantzitsua da bonba-auto baten arriskupean dagoen hainbeste jenderen bizia da», esan zuen Fra-

gak. Beldurraren bidez nagusitu nahi dutenei «aurre» egin behar zaie, Fragaren ustez. Dagoeneko askok, baita Euskal Herrian ere, hala egiten dutela nabarmendu zuen.

Agintariei legeen bidez «terrorismoari aurre egiteko» deia egin zien, eta «legeak ematen dituen aterabide batzuk» erabili gabe dardela ohartarazi. «Terrorismoa eta hori sustengatzen duten guztiak legez kanpo jarri behar dira, ondorio

guztiekin», gaineratu zuen, egungo Xuntako presidentek Herri Batasunaren ilegalizazioa gogoan izanik.

Manuel Fragak atentatu saio batzuk jasan ditu azken urteotan, baita bere etxearen kontrako ere. 1977. urtean ETA-pm saiatu zen Fragaren kontra atentatu bat egiten, APko lehendakaria zenean. 1984ko otsailaren 14an, Komando Autonomoek lehergailu bat jarri zuten Zarautzen, Fragak mitin bat

eman behar zuen tokian. Lehergailuak ekitaldia hasi aurretik egin zuen eztanda eta ez zuen biktimarik eragin. Azkenik, Ejercito Guerrillero do Pobo Galego Ceive erakundeak bonba bat jarri zuen Fragaren udako etxean, Perbesen. Leherketak suntsitu egin zuen Xuntako lehendakariaren etxea. Aurten argitaratutako informazioen arabera, Barne Ministerioak diru bereziekin ordaindu zen etxearen berregitea. X

Ortega Lararen askatasunaren aldeko martxa egiten ari da BAK

■ Bilboko gotzainak ere funtzionarioa izan zuen gogoan Santiago Egunaren homilian

Erredakzioa / Donostia

ASTEAZKENEAN arratsaldeko seietan atera zen Bastidatik Burgoseraino oinez joango den martxa. BAKek Ortega Lararen alde antolatutako ibilaldian 50 lagun inguru ari dira parte hartzen, eta hauen artean dago Rosa Diez Eusko Jaurlaritzako Turismo eta Merkataritza sailburua. Partehartzaileek asteazkenean Bastidatik Casalarreinarako bidea egin zuten, eta orain Burgoserako bidean jarraitzen dute. Ibiltariak «Martxan Ortega alderdiaren alde -Bakearen Aldeko Koordinakundea- Elkartasuna» leloa duen pankarta daramate, eta adierazi dutenez, helburua «Ortega sendiari eta Burgosko herri-tarrei elkartasun zintzoa adieraztea da, denbora gehiegi baitaramate senide, auzokide eta lagun baten bahiketa jasaten».

BAKek deitutako lagunak Bastidan bildu zirenean parrain izan zituzten presoek Euskal Herriratzeko eta amnistia eskatzen zuten jende multzo bat. Hauek martxaren atzetik abiatzen saiatu ziren, baina Ertzaintzak galarazi egin zien. X

Nafarroan sortzen ari diren «amnesia kolektiboa» salatu du HBk

■ «Itxiera faltsua» bultzatu nahi dela uste du Ezker Abertzalea taldeak

Erredakzioa / Iruñea

EZKER ABERTZALEA taldeak Nafarroako Parlamentuko lehendakariaren eta alderdi politikoaren arteko bileretan ez duela parte hartuko esan du. Talde horren aburuz, horiek «arduradun politikoak Nafarroako Parlamentuko pasiloetan ibiltzea» baino ez du ekarriko, eta alderdiek «benetan egoera honetara eramane gaituen arrazoiak modu faltsuan ixtea» dutela helburu uste du. HBren ustez, «amnesia kolektiboa sortzen saiatzen ari dira, Nafarroan ardura karguak bete ohi dituen lapur taldea ahaz dezagun».

Azkenik, Ezker Abertzalea taldeak Iuren eta EAren jarraitzaile kritikatuta, «ezkerraren izenean Nafarroako alderdi ustelenetako bati keinuak egiten baitizkiote etengabe». Ezker Abertzalearen aburuz, hau egiten dute «beren alderdien interesen arabera» jokatzeko dutelako. X